

# Las aventuras da Xena Ruinatscha, detectiva privata

■ **Xena Ruinatscha, la detectiva cun ferma bratscha, è ina detectiva suverana. Nagin e nagut na po impedir ella da chattar ora la vardad e da schliar ils cas. E mintgatant è perfin Baseli, ses partenari, in agid, sch' i sa tracta da chattar puspè glimajas sparidas u sch' ina banda da laders sto vegnir tschiffada...** Ils crimis da Xena Ruinatscha, scrits da Manfred Veraguth, èn adattads per uffants da 7 fin 13 onns. En il decurs dals onns 2004/2005 ha il Radio Rumantsch emess radund 20 cas (cun las vuschs da Nadja Cadonau sco Xena, Manfred Veraguth sco Baseli, Erwin Ardüser e Georgina Janki: ulteriuras rollas). Las singulas episodas han ina lunghezza da radund 8-10 minutas. Ina schelta da sis crimis è plinavant cumparida il 2005 sin disc cumpact e vegn preschenta da qua in pau pli a fund.

## Chaus ch'èn morts, na giappon betg

Xena Ruinatscha è gist s'installada en ses biro e cumenza plain schlantsch sia nova lavur sco detectiva. Ses partenari, l'advocat Baseli Cafoghel, aveva publictà il di avant il suandant inserat en la gassetta: «Dovras ina detectiva cun ferma bratscha? T'annunzia tar Xena Ruinatscha!»

La finala s'annunzia l'emprim client. Igl è in possessur da chaun che dumonda Xena da sclerir tgi ch'haja dà tissi a ses doberman. E propi: en il cup da magliar dal chaun èn anc restanzas e tranter quellas sa chattan graunins blau stgirs da tissi da mieurs.

Xena discorra cun ils vischins e vegn a savair che l'um e ses chaun n'èn betg gist bainvis. La finala chatta Xena or ch'il possessur sez è il delinquent. El n'era betg vegni da dressar il chaun ed al aveva la finala tissientà per betg stuair conceder ch'el haja disditg.

## Gudagnar a tut pretsch!

Ina mamma telefescha a Xena. Cun ses figl na saja insatge betg en urden dapi ch'el gaja a trenament da ballape. Arrivada tar la mamma, vegn Xena a savair ch'il figl ha gist gi in'attatga dal cor. «El aveva bain in sbagl dal cor, ma gist in'attatga... El ha pir 16 onns...»

La mamma è persuadida ch'igl ha da far insatge cun ses trenament da ballape. Xena va a la piazza da ballape e sa metta a la tschertga da fastizs. La notg entra ella en la chamona dal club e chattat satgets che cuntengan ina pulvra alva – in preparat da doping. En quel mument arriva il trenader – ma cun sia bratscha ferma vegn Xena da tegnair ferm il delinquent fin che la polizia arriva.

## Il rinnader da glimajas

Il terz cas da Xena Ruinatscha è in pau mutschignus – el ha numnadain da far cun glimajas e lindornas. In rinnader da glimajas declera a Xena ch'i sajan vegnids engulads intgins da ses exemplars ils pli custavels. El suspecta signur Casti, in auter rinnader, ch'al aveva dumandà adumbatten da pudair cumparar intginas da sias glimajas.

Ma cura che Xena arriva tar signur Casti chatta ella la polizia en acziun – il suspect è numnadain vegni sturni. Sco culpanta vegn la finala tschiffada Maja Studer, l'amia da signur Casti. Ella era stada pli baid l'amia da l'emprim rinnader da glimajas; la finala aveva ella bandunà quel, perquai ch'el aveva daplì interess per las glimajas che per ella. Cun signur Casti daventava uss il medem; ed ella al ha vuli metter or da via uschia che la culpa crodia sin l'auter rinnader da glimajas.

## Il plaz striunà

Igl è l'emprim d'avust e Xena sa legra sin ina festa patgifica – ma i dueva vegnir auter... In emplotà da vischnanca s'annunzia tar ella e di che la laina per il fiu da l'emprim d'avust svaneschia trasor. I fa schizunt la currella che la piazza dal fiu d'emprim d'avust saja striunada!

Ma interessantamain insistan precis ils dus lavurers ch'han da far il nov mantun ch'i saja en striegn. E propi: Xena scuvra ch'els vulan be tegnair davent da la piazza aspectatur – per laschar svanir els sez la laina.

## La banda da laders

Igl è temp da vacanzas e Xena va en il bogn avert. Tutenina curra in mattatsch sper ella vi e tschiffa sia tastga. Sa chapescha che Xena po tiers il lader ed al dat in brav lavachau.

Ma strusch che Xena ha bandunà il bogn, sto ella puspè curren suenter a giuvenots ch'han spoglià ina butia. E quel ch'ella tschiffa è puspè il medem sco en il bogn. Ma Xena smina ch'el è be la roda flaiva d'ina banda da laders giuvenots.

Xena sa metta a la guetta en ina butia da telefonins e po la finala metter a ferm la banda. Ed il mattatsch che Xena aveva tschiffà duas giadas? Quel confessa ch'els giuvenots al hajan sfurzà da commetter ils ladernitschs. Ed el dat uss a sia vita ina nova finamira e vul daventar in bun detectiv sco Xena!


## Il stgazi

Ina dunna s'annunzia tar Xena e di che ses um na saja betg pli turnà d'ina tura en in cuvel. Xena e Baseli van a guardar e chattan l'um mort en il cuvel. La clienta è consternada. Ma ella manegia che quai haja stui vegnir uschè lunsch: ses um haja perscrutà cuvels e cuvels a la tschertga d'in stgazi, ma n'haja mai chattà insatge. Ed ussa quest accident tragic!

Xena però na crai betg ch'i sa tracta d'in accident e returna en il cuvel. Là frunta ella sin in um che metta objects traglichants en in satg. Cun sia ferma bratscha vegn Xena d'al tschiffar e metter a ferm. L'um aveva propi chattà cun ses collega in stgazi, ma cuntrari a lez na vuleva el betg surdar il stgazi a la vischnanca, mabain vender il sin il martgà nair ed uschia daventar ritg. Or da



Tgi ha tissientà il chaun?



Cuverta dal disc cumpact.

la disputa en il cuvel era daventà in cumbat, in cumbat mortal. E per tegnair tut discus, leva l'assassin transportar il stgazi mo zic a zic e mo da stgir or dal cuvel.

## Las ulteriuras episodas en survista

**La creatira terribla:** Esser detectiva n'è betg adina ina chausa simpla. En quest'episoda sa chatta Xena tuttenina en in gaud spess e stgir davos in pèr pigns. Ses client ha fatg ina scuverta terribla – e Xena duai confermar quai ch'el ha vis...

**Il rapiment:** Il star da musica Mauro è vegni rapinà! Èsi pervi da sia musica, èsi pervi da sia persuna – tgi sa? Tge cletg che la detectiva Xena Ruinatscha è gist al lieu cura ch'i capita. Cler ch'ella vegn da schliar il cas. Ma co?

**In'istorgia da Nadal:** Curt avant Nadal vegn Xena clamada en in grond negozi. D'ina maisa cun rauba da Nadal svaneschan là mintga di in pèr chaussas. Sin ils videos da las cameras da surveglianza n'è però da vesair nagut. La finala vegnan a la glisch laders ch'ins n'avev mai sminà.

**Scola da skis:** En quest'episoda accumulognan ils auditurs la detectiva Xena Ruinatscha a scola da skis. Ina mamma la ha tramess là, perquai che ses dus uffants èn l'entir di absents – e quai malgrà ch'els èn annunziads tar la classa da skis. Nua èn ils dus uffants l'entir di?

**Tschaiver mortal:** Da tschaiver na vegn betg mo festivà, sunà e sa maschrà, durant tschaiver succedan era tut autras chaussas. Uschia per exempel la mort d'in um en ina butia da costums. Tge è pomai capità?

**Il plan misterius:** In um vegn tar Xena cun in plan ch'el ha iertà. Sin quel èn da vesair las conturas d'ina baselgia e massa cifras e bustabs misterius. La finala reusseschi a Xena e Baseli da chattar questa baselgia. Tgi sa, tge misteri ch'è zuppa là?

**Il vandal:** En quest'episoda è Xena Ruinatscha confruntada cun vandalissem. E nua ch'igl ha vandalissem hai er in vandal. U èsi forsà tut auter che quai ch'i para? La detectiva Xena Ruinatscha ha da far la pel plaina per chattar la dretga resposta sin questa dumonda.

**Ils gorillas svanids:** Xena Ruinatscha vegn clamada en il zoo – là èn svanids in pitschen gorilla e sia mamma. E pauc pli tard arriva ina brev cun la pretensium d'engrondir la chasa da gorillas. Tgi sa zuppa davos quest rapiment e tgi pretenda talas chaussas?

**A la staziun:** Questa giada è Xena Ruinatscha a la staziun. Qua regia in vair caos: las uras na funcziunan betg, ils chanasters vegnan cupitgads regularmain e grafts decoreschan las paraids. E sco detectiva da vaglia sa metta Xena immediat a la tschertga da fastizs che pudessan manar tar ils culpants.

**Ils spierti da la notg:** Tar Xena Ruinatscha datti spierti, u almain en quest'episoda. Quella maina la giuvna detectiva tar ina dunna che abitescha en ina chasa veglia. Si surchombras da questa chasa pari propi d'avair spierti. Tgi u tge sa zuppa davos quests spierti?

**En scola:** Xena Ruinatscha vegn clamada en ina scola. In scolast suppona numnadain ch'i vegnia prendi drogas en sia scola. Ma igl è tut auter che simpel per Xena d'intervegnir insatge da las scolaras e dals scolars.

**Ils cactus:** Quest cas maina Xena e Baseli en in chastè che sa preschenta sc'ina fortezza. En quel tgira la possessura cun grond quità ses curtin tropic. Ma co èsi pussaivel ch'i vegnan adina puspè engulads cactus d'in lieu uschè segir?

La fin da l'onn 2005 è la seria da crimis da Xena Ruinatscha ida a fin cun trais ulteriuras episodas, numnadain *Enguladitsch en la halla*, *Il recept da tschigulatta* e *Nua è il Bambin?*

## Prova da text

Per dar in'impresium dal stil dals crimis suonda qua l'emprima part da l'episoda «Chaus ch'èn morts, na giappon betg»: «I va adina tgunsch, sch'ins prenda a mauns ina nova lavur – uschia sun jau ida plain schlantsch en mes nov biro. El sa chattava al plaunterren da la chasa, nua che Baseli Cafoghel aveva sia pratica d'advocats. Baseli era mes partenari, el aveva manegià da magari pudair durrar ina detectiva per far retschertgas tar in da ses cas, uschia che nus avevan gist avert in biro da detectivs – cun mai sco detectiva. Ma l'emprim di n'hai jau betg spetgà blera lavur.

Sco emprim hai jau controllà mes mails – ma l'inserat che Baseli aveva publictà ier en la gassetta n'aveva anc betg gi effect. Nagin n'aveva reagì sin l'annunzia: «Dovras ina detectiva cun ferma bratscha? T'annunzia tar Xena Ruinatscha!» *Il telefon scalina.*

*Xena: Ruinatscha! (pausa)* Cun ferma bratscha, gea! *(rir ironic – pausa, lura violentada)* Na, jau na gid betg a midar chasa! *(penda si)* Quest stoda inserat! Jau avess fatg meglier da betg tadlar sin Baseli, quel advocat da la bell'aura! Quel n'ha nagin'idea da reclama...

*Il telefon scalina puspè.*

*Xena: (prenda giu il telefon)* Pel diavell! Jau hai bain ditg che jau... aha, gea, Ruinatscha, la detectiva, perstgisai. Sa chapescha. Na, na, ina malchapientscha...

Malgrà mias smaladicziuns eri gartegià da persvader l'um al telefon da mias qualitads – mes emprim client. Igl ha fatg la parita d'esser ina lavur simpla – l'entschatta è dentant stada tut auter ch'in bel guardar...

Mes client m'ha mussà il cadaver da ses chaun – in doberman che fascheva davairas nauscha figura.

*Client:* Insatgi ha dà tissi a Cuno oz en damaun!

*Xena:* Na vulais betg ir cun Voss chaun tar in veterinari? Forsa n'è el betg vegni tissientà, ma mort d'insatge auter...

*Client:* Mort d'insatge auter – ma da tge pomai? Jau n'hai betg engaschà Vus per far da sabiutta, mabain per sclerir tgi che ha dà tissi a mes chaun!

Damai che l'onurari n'era betg mal e ch'jau na vuleva betg gia tagnar tar mes emprim cas, sun jau ma messa a la tschertga da fastizs. En il cup da magliar dal chaun eran anc restanzas e tranter quellas propi tissi, quests graunins blau stgirs che tut quels han a chasa, als quals gia il pled «mieur» u «ratun» fa tut pelgiagliana...

Il possessur dal chaun n'ha betg pudì dir, tgi che pudess esser stà il malfatschent. Uschia hai jau discurre l'entir di cun ils vischins. Ina lavur malempennavla, oravant tut perquai che nagin na pudeva savurar ni chaun ni possessur. Ina dunna pli veglia ha manegià ch'ella saja cuntenta ch'il chaun saja davent.

*Dunna veglia:* Vus stuais savair, quest chaun marsch giappava l'entir benedi di – ed il mender: el fascheva sia fatschenta en mes iert!

*Xena:* Na vegn betg ad esser! Ma forsà che cac da chaun ha in effect positiv sin il svilup da la salata!

*Dunna veglia:* Tgi sa, ma mia salata crescha era uschia stupent – saja sco ch'i veglia, quest chaunochel na vegn mai pli a mulestar insatgi!

Il chaun era crappà, ils vischins cuntents... ed il tissi era il sulet fastiz – in fastiz che na manava nagliur. Betg gist bunas premissas per l'emprim di da lavur d'ina detectiva!»

## La preschentaizun:

Manfred Veraguth. Xena Ruinatscha. (DC). Cuiura 2005.

## Dapli infurmaziuns:

chatta.ch/?id=1338&hiid=145  
www.chatta.ch